



INFLASI bagi kumpulan makanan dan minuman bukan alkohol terus menunjukkan penurunan signifikan kepada paras 4.7 peratus pada Jun lalu, berbanding 5.9 peratus pada Mei. – GAMBAR HIASAN

Kenanga jangka OPR kekal sehingga 2024

PETALING JAYA – Firma penyelidikan pasaran, Kenanga Research menjangkakan Bank Negara Malaysia (BNM) akan mengekalkan kadar dasar semalaman (OPR) pada tiga peratus untuk enam hingga 12 bulan akan datang memandangkan kadar inflasi negara terus menurun.

Jabatan Perangkaan kelmarin mengumumkan inflasi Malaysia menurun kepada tahap terendah dalam tempoh 14 bulan pada 2.4 peratus Jun lalu, daripada 2.8 peratus pada Mei.

Kenanga dalam satu nota penyelidikan yang diterbitkan semalam turut mengekalkan ramalan inflasi negara pada tahap 2.9 peratus untuk tahun ini, berbanding 3.3 peratus bagi keseluruhan tahun 2022.

"Walau bagaimanapun melihat ke hadapan, ketidakpastian

dasar kerajaan, risiko geopolitik dan keadaan cuaca boleh mengubah pandangan harga, seterusnya mendorong BNM untuk menilai semula dan mengambil tindakan sewajarnya jika perlu," katanya.

Menurut firma berkenaan, risiko kenaikan inflasi kekal ada meskipun dalam suasana kejatuhan berterusan harga makanan global dengan jangkaan ketibaan tempoh cuaca ekstrem, El Nino dalam beberapa bulan akan datang.

"Selain itu, keputusan Rusia untuk menarik diri daripada perjanjian bijirin Laut Hitam dan larangan eksport beras India dijangka memberi kesan negatif kepada keselamatan makanan di Asia.

"Akibatnya, harga makanan di Malaysia mungkin meningkat

pada suku tahun keempat 2023 dan suku tahun pertama 2024, namun inflasi masih diunjurkan dalam aliran rendah pada bulan-bulan akan datang, terutamanya disebabkan kesan asas yang menggalakkan," katanya.

Sementara itu, MIDF Research menjangka kerajaan bakal mengekalkan status quo harga runcit bahan api sekurang-kurangnya sehingga akhir tahun ini, yang bakal menetapkan purata inflasi bahan bukan makanan pada 1.5 peratus tahun ini.

"Setakat enam bulan pertama tahun ini, purata inflasi makanan adalah pada 6.2 peratus, lebih tinggi berbanding 5.7 peratus tahun lalu dan mengambil kira kedua-dua komponen ini, kami menjangka kadar inflasi Malaysia mencecah tiga peratus untuk tahun ini," katanya.